

古胸考略第九卷

海州喬紹傳纂

忠義考

宋

張玘字伯玉河南澠池人紹興三十二年為御前宿衛前軍都統屯泗州時金人次海州急詔玘會鎮江都統制張子蓋赴之賊環城數十匝矢石如雨玘戰於州北三里麾精騎衝其陣手殺數十人殲其長殺獲萬計海州圍解玘中流矢卒子蓋上其功特贈正

古胸考略

卷之九

一

任觀察使官其後九人廟號忠勇孝宗即位又命祠於戰所贈清遠軍承宣使

宋史

明

何洲海州人不知仕何官與宋和郭節友善素以忠義相勗靖難後遂相約棄官為筮人客死異域竟莫識其姓名王詔合和節洲而系之贊曰箕子陳範嚴氏隱卜義有從否道有宜告烈烈英賢寥寥冥鵠

鄭

曉吾學編

鄭端簡公云松陽王詔游治平寺觀轉藏聞藏上
嘆嘆有聲異之令人緣藏登絕頂無所見見書一
卷載建文時出亡臣僚二十餘人紙毀字爛不可
讀讀數日祇得何洲宋和郭節等九人可識詔憐
其忠又得之異各贊數語題曰忠賢奇秘錄
海州志云丁亥洲訪帝於粵西至連州復偕郭節
入蜀不值乙卯秋洲鬻書於桂林市遇程濟濟引
見帝相持慟哭勸帝南還尋病卒年七十三

古胸考略

卷之九

一一

周恕海州人與何州同為中官素以忠義相勗建文
初燕世子來朝恕請留之帝不可未幾兵起帝海不
周恕言壬午六月帝遜去至神樂觀恕約洲追侍焉
帝命散云各變姓名走湖湘間恕憂病死蕭寺
劉文炳海州人莊烈帝生母劉太后姪也崇禎十七
年都城戒嚴詔文炳及弟文耀入衛時李邦華請太
子南遷不及事急上召文炳及駙馬都尉鞏永固
使獲行文炳叩頭言外戚親臣不藏甲臣等徒手要

能獲皇上搏賊皆相嚮而哭既而城陷文炳文耀闔

門死

毛西河文集

彭思仁海州人夙稱義俠天啟壬戌西鎮民以白蓮
教相倡惑思仁統率哨總朱仕等捕之民賴以安州
上其事錫以冠帶

王友直字益吾海州人為州據時多善行精周易卜
筮之法明末賊臨城繼母忘日義不忍去遂罵賊死
後樵人遊青龍絕巘每見其策杖賦詩焉子之翰廩

古胸考略

卷之九

三

生

袁鼎海州人崇禎壬午武闈第一癸未進士授江西
遊擊明季領兵守金華不屈節而死

周日健高拱奎皆海州諸生也崇禎壬午冬賊臨城
拱奎守父柩日健守老母不去賊執二子索金帛不
得皆罵賊而死

孝行考

元

孫通海州孫家山人母喪貧不能葬通號泣呼天錢
擁戶外取以葬母餘悉歸官官旌其門

顧乾雲臺志

明

張天爵東海所千戶與同時大義村伏化徐瀆場張
桂俱親歿各廬墓三年

吳恒宣雲臺志

徐謐海州人歷任北府軍右衛經歷父母歿廬墓三
年有白鹿來馴州上其事宏治三年旌表

乙方海州人左參議瑄之父也方父仲名患疽危甚

古胸考略

卷之九

四

方吮之立愈人稱孝感

潘紹莞瀆人事寡母至孝宏治十七年有司具奏旌

其母給紹冠帶

鹽法志

丁澄海州人西海所百戶母疾割股以啖立愈後受
旌表

周維熊海州人以太學生授鴻臚序班遷長沙府尹
母疾維熊與妻鄭不謀而同焚香割股以奉母立愈
後受旌表

劉秘海州人父光祖與母相繼亡秘廬于墓遂卒年甫二旬

王錫璋海州生員割股治祖啟韶病延壽十年受旌表

苗其穎海州廩生母病割股以療遂愈州守予額曰孝念最真

陸國光海州廩生母病割股捋痊後蒙旌獎

李三策海州人父病割股療愈後蒙旌表

古胸考略

卷之九

五

胡舊漢東海人母病時舊漢年十八焚香告天連割肝二葉母食之即愈後蒙旌表

雲臺志作曰漢

張應時海州人割左股療父病右股療母病皆愈

以

上參海州志

劉思閔中村人與東海相儀皆母病割股

吳恒宣雲臺志

國朝

江鍾琬南城人庠生父母歿廬墓三年

趙有慶大村人庠生父母歿廬墓終生

吳氏雲台志

劉加年海州新興瞳人竈籍雖目不識一丁而性至孝每日采薪入市賣之必市餅餌等食物數枚歸奉親遇有甘旨必俟親啖餘然後食終身無倦乾隆乙巳十月十一日卒鄰里傳其卒時自言為某地神以事涉荒怪未敢錄而孝行則真實不誣

獨行考

晉

閩德東海人唐彬嘗受學門徒甚多獨目彬有廊廟

古胸考略

卷之九

六

才及彬官而德己卒乃為之立碑

晉書唐彬傳

繆施東海人以時譽選入著作撰集魏書

晉書傳元

南齊

徐生之東海人五世同居建元三年大使巡行天下

奏之詔表門閭蠲稅租

南齊書

宋

徐庸字叔平海州人深研易理皇祐初選周易蘊凡例一卷周易變卦解二卷以矯漢魏諸儒之失

黃巖字一峯海州人隱居不仕結廬於雲隴之中與蔡仲許清友善二人乘暇問曰夫子終日何為嘆曰野鶴卧雲耳年九十無疾而終

段興海州人正統六年大饑納粟一千石助賑奉勅旌表又有李榮納粟一千石李明善納粟五百石張昶字文顯海州湖西灣人由生員援例冠帶其父通嘗貸數百金於人焚券不責償昶好施與如其父嘉靖甲辰州大饑昶以所積賑隣近居民全活甚衆

古胸考略

卷之九

七

親友生養死葬之無力者咸賙之子朝瑞見名獻考江之淵海州東海諸生也值明季甲申後隱居深山足不履城市以介節終

陳秉常海州諸生也明季州境屢遭兵燹積骸遍野秉常施義地掩埋者年餘而竣

國朝

汪時雨海州人歙縣籍順治五年海州亢旱漕糧難完時雨蠲銀五百代納州憲給額旌獎

見海州志

喬火海州板浦場人

時未分中國初歲荒出粟數百正場故云

國初歲荒出粟數百

斛賑饑又喬土州增生以厚德重於鄉舉鄉飲大賓

見鹽法志守義類

楊爐板浦人素性淳良持躬謙厚寿近百歲兩舉賓

筵

宋視板浦人鄉飲賓持躬敬慎教子以義方

徐萬板浦人素心温良宅心純厚

喬文華板浦人增生謙卑遜順有古君子風寿近百

古胸考略

卷之九

八

歲

駱士俊板浦人增生居鄉謹厚寿近百齡

丁應正板浦人飭躬享謹制行端疑兩舉鄉飲寿登

八十

以上六人見鹽法志篤行類

僑寓考

後漢

包咸字子良會稽曲阿人少為諸生受業長安師事
博士右師細君習魯詩論語王莽末去歸鄉里於東

海界為亦眉賊所得拘十餘日咸晨夜誦經自若賊異而遣之因住東海立精舍講授光武即位乃歸鄉里建武中入授皇太子論語即明帝也後官至大鴻臚有論語章句行世

後漢書

邴原字根矩北海朱虛人少與管寧俱以操尚稱州府辟命皆不就黃巾起原將家屬入海住鬱洲山中時孔融為北海相舉原有道原以黃巾方盛遂至遼東住僅一年往歸原居者數百家游學之士教授之

古胸考略

卷之九

九

聲不絕後得後曹公辟為司空掾從署丞相徵事遷五官將長史曹公征吳原從行卒

魏志

南齊

明僧紹字承烈平原鬲人也祖玩州治中父略給事中僧紹宋元嘉中再舉秀才明經有儒術承光中鎮北府辟功曹並不就隱長廣郡嶗山聚徒立學淮北入魏乃南渡江明帝泰始六年徵通直郎不就昇明中太祖為太傅教辟僧紹及顧歡臧榮緒以旂幣之

禮徵為記室參軍不至僧紹弟慶符為青州僧紹乏糧食隨慶符之鬱洲住弇榆山栖雲精舍欣玩水石竟不一入州城建元元年冬紹曰朕側席思士戴懷塵外齊郡明僧紹標志高栖耽情墳素幽貞之操宜加賁飾徵為正員外郎稱病不就其後與崔思祖書曰明居士操意可重吾前旨竟未達邪小涼欲有講事卿可至彼且述吾意令與慶符俱歸又曰不食周粟而食周薇古猶發議在今寧得息談邪聊以為笑

慶符罷任僧紹隨歸住江乘攝山太祖謂慶符曰卿兄高尚其事亦堯之外臣朕雖不相接有時通夢遺僧紹竹根如意筍籜冠僧紹聞沙門釋僧遠風德往候定林寺太祖欲出寺見之僧遠問僧紹曰天子若來居士若為相對僧紹曰山藪之人正當鑿坏以通若辭不獲命便當依戴公故事耳永明元年世祖勅召僧紹稱疾不肯見詔徵國子博士不就卒

南齊書

封延伯字仲璉渤海人也有學行不與世人交事寡

嫂甚謹州辟主簿舉秀才不就後乃仕垣崇祖為豫州啟太祖用為長吏帶梁郡太守以疾自免僑居東海遂不至京師三世同財為北州所宗附豫章王辟中兵不就卒

南齊書

唐

成元英字子實陝州人隱居東海貞觀五年召至京師永徽中徙郁州為道士注老子道德二卷又開題序訣義疏七卷注莊子三十卷疏十二卷

宋志存十八卷餘亡

古胸考略

卷之九

十一

書成道王元慶遣文學賈鼎就授大義嵩高山人李利涉為序惟老子注莊子疏著錄

唐書藝文志宋史藝文志載成元

英易流演五卷在五行類

宋

宋昭徽宗時為朝散郎宣和四年九月戊午上書極言遼不可攻金不可鄰異時金必敗盟為中國患乞誅王黼童貫趙良嗣等黼大惡之秋九月除昭名編

管海州

續通鑑

國朝

張鴻烈字毅文山陽人由廩監生康熙己未召試博
學鴻辭 欽取二等十四名授翰林院檢討以上疏
言事謫官徙宅於東海郁洲之上同寮咸賦詩為別
秀水朱竹垞作送張檢討還郁洲山序初鴻烈父考
功公思卜築於此山至是成其志云

朱彝尊曝書亭集

凌廷堪字仲子一字敬與海州板浦場人安徽歙縣
籍父文焜國學坐於雍正間以鹺務來海上遂家焉

古胸考略

卷之九

十二

乾隆丁丑秋生先生於胸浦邸舍無何文焜公卒先
生事太夫人許氏孝養備至癸卯春北上應京兆試
受業於閣學翁覃溪先生之門庚戌成進士 詔歸
班以知縣用緣親老冀得俸入終養詣禮部請改教
職馬初太夫人命之宦學四方先生以待養辭不獲
已請每歲一歸省親許焉遂歷遊齊魯燕趙秦晉楚
豫吳越足跡半天下所至交其賢豪長者遇山川勝
蹟雖嶮巖必躡履登臨有太史公上會稽探禹穴意

又皆發為文詞託諸詩歌以抒磊落瑰奇之氣其學自蒙緯地與典章名物勾股等類無所不窺而尤研精三禮嘗欲著禮經釋例蒼萃漢唐宋元諸儒之說折衷成書以卷繁尚未藏事又校訂三禮注疏及通志堂經解所刊楊復儀禮圖命善繪事者為校禮圖朱石君學士見之用昌黎薦士詩韻題其簡端於易尊荀虞而不主焦贛京房之偏於史進魏金而不泥東晉南宋之統其古文上溯漢魏下暨韓蘇而亦不

廢六朝之駢儷詩學以盛唐為宗而旁參以玉局翁遺山叟之稟兀不群凡一名一器必考据巔末務求確解而後己班固稱漢河間獻王實事求是先生庶得其遺意云自文煇公卜宅海州至先生之寧國任所始復歸於歛計僑寓於胸者三世閱七十餘年凡先生在海上所著詩古文集錄於藝文考而此後撰述不與焉

明

高遜志蕭縣人寓嘉興幼嗜學師貢師泰周伯琦等
文章典雅成一家言洪武初徵修元史入翰林累遷
吏部侍郎以事謫胸山建文初召為太常少卿與董
倫同主會試得士如王良胡靖吳溥楊榮金幼孜楊
溥胡濙顧佐等皆為名臣燕師入存歿無考

明史附
王良傳

古胸考略

卷之九

十四